

# No Mata e Pashènt, Eduká e Dòkter

Un dia, kada un di nos ta bai muri. Mayoria di nos ta preferá pa no pensa tokante nos propio morto. Ma tin hende ku si ta pensa hopi tokante morto—nan morto, bo morto, mi morto. Nan ta hende ku ta promové eutanasia.

Pueblo hulandes ta aprobá pa médikonan (esnan ku mester promové bida i salú) kita bida di hende desde 1993. Ta kalkulá ku promé ku 1993, médikonan hulandes intenshonalmente a mata 3.000 pèrsona kada aña. Miles mas a muri despues.

Beibel ta bisa ku “*Dios a krea hende segun Su mes imagen*” (Gènesis 1:26-27). Tur bida humano ta sagrado. Pesei Dios ta duna e mandamentu, “*No mata*” (Eksodo 20:13). Skritura tambe ta bisa ku hende “*su dianan ta kontá, e kantidat di su lunanan ta ku Bo (Dios), Bo ta stipulá su límitenan, kualnan e no por pasa*” (Jòb 14:5). Dios, no hende, ta pèrmití pa kita bida di hende!

Talbes nos ta imaginá ku nos islanan karibense ta tan alehá di Hulanda ku nan desishon tokante eutanasia lo no tin un afekto riba nos. Ma nos ta kiboká! Ya kaba nos islanan ta infektá pa e mentalidat burdugu ku Hulanda a aseptá. NOS enfemeranan i dòkternan ta haña lès di proponentenan di eutanasia. E lèsnan ta diseñá pa konvensé nan alumnonan di nan filosofia venená. E indòktrinashon aki ta tumando lugá no solamente na Hulanda, unda hopi di nan ta haña nan edukashon, ma tambe **na nos islanan!** Kisas **bo** dòkter, òf e enfemera banda di **bo** kama na hòspital, ta haña ku un angua venená por ta étiko, i asta deseábel!

Ta un echu ku algun hende ta sufri hopi doló promé ku nan ta muri. Un di argumentonan prinsipal di proponentenan di eutanasia ta ku morto ta preferibel, i sigur ta mas misericòrdioso, pa un pèrsona ku ta sufri tantu doló. Ma awendia, doló òf morto no ta e úniko opshonnan ku ta eksistí. Tin un otro opshon!

Segun dòkter Russell K. Portenoy, skirbiendo den e revista *Cancer*, médikonan i spesialistanan no ta duna un preskripshon adekuá pa suavisá e doló di 50 te 75% di pashèntnan ku ta sufri di kanser. Dor di un enkuesta na aña 1989, O rganisashon di Salú Mundial a yega na e mésun konklushon.

Bill, un merikano di 80 aña, tabatin doló severo den su pechu, tosamentu, i a pèrdè 20 kilo na aña 1988. Dor di saka potrèt, dòkternan a konstatá ku Bill tabatin kanser di pulmon. Su dos médikonan a preskribí Demerol i Codeine, bisando ku e no por tuma remedi mas potente. Ma asta ku e remedinan ei, e doló tabata insoportabel, i Bill a kuminsá plania suisidio. Su yu a hib’è na un spesialisista di kanser. El a preskribí morfina ku por bebe. Dentro di poko tempu, su doló a disparsé kompletamente. Awe, sinku aña despues, Bill ainda ta aktivo i ta gosa di bida. Si eutanasia tabata legal, Bill lo a muri na aña 1988. E ta kontentu awor ku e no a muri, i ta oponé kontra legalisashon di eutanasia. Den nos era moderno, ku remedinan potente disponibel, ta innesesario pa hende sufri doló insoportabel. Dòkternan i enfemeranan, indoktriná pa kere ku eutanasia ta un opshon aseptabel pa pashèntnan ku enfermedatnan doloroso, ta falta informashon. Na lugá di mata e pashènt, mihó eduká e dòkter!

Organisashon di Salú Mundial a hasi un enkuesta di médikonan merikano, i a haña ku mas ku 50% no tabata sa ku morfina ta eksistí na un forma ku e pashènt por beb’è. Hopi médiko tabata preskribí Demerol i Codeine, un kombinashon ku hopi biaha no ta efektivu.

Asta e pionero hulandes di eutanasia, dòkter Pieter Admiraal, vários bes a deklará ku tur doló por ta kontrolá, i ku **eutanasia pa motibu di doló no ta étiko.**

No tin nodi pa hende muri ku doló awendia. Si un pashènt ta muriendo di kanser, òf un otro enfermedat doloroso, kiko nos mester hasi pa yuda nan? Legalisá eutanasia, pa nan por muri un morto innesesario pa skapa doló innesesario? Nò! Ta muchu mas mihó pa eduká dòkternan i enfemeranan di remedinan moderno ku por kita e doló, i hasié pusibel pa nan gosa e dianan ku ta sobra di nan bida.

Na lugá di mata e pashènt, mihó eduká e dòkter!